



Concello de Vigo

ACTA DA XUNTA DE GOBERNO LOCAL
Sesión do 4 de xuño de 2018

ASISTENTES:

Membros :

D. Abel Caballero Álvarez
D. Carlos López Font
M^a José Caride Estévez
D. Cayetano Rodríguez Escudero.
D. Angel Rivas González.
D. Jaime Aneiros Pereira.

NON ASISTEN:

D^a M^a. Carmen Silva Rego
D. David Regades Fernández
D^a. Olga Alonso Suárez
D^a. M^a. Isaura Abelairas Rodríguez

Na Casa do Concello de Vigo, ás catorce horas e quince minutos do día catro de xuño de dous mil dezaioito e baixo a presidencia do Excmo. Sr. alcalde, Sr. Caballero Álvarez, coa asistencia dos concelleiros/as anteriormente citados, actuando como Secretario o concelleiro, Sr. Rodríguez Escudero, constitúese a Xunta de Goberno Local desta Corporación co obxecto de realizar sesión EXTRAORDINARIA E URXENTE de acordo coa orde do día remitida a tódolos membros coa antelación legal precisa.

Está tamén presente por invitación, a titular do órgano de apoio á Xunta de Goberno Local, Sra. Campos Acuña.

A Xunta de Goberno Local adopta os seguintes acordos:

1(590).- RATIFICACIÓN DA URXENCIA.

A Xunta de Goberno local ratifica a urxencia da sesión.

2(591).- AMPLIACIÓN DO PRAZO DE PRESENTACIÓN DE OFERTAS NO PROCEDEMENTO ABERTO PARA A CONTRATACIÓN DO SERVIZO DE PRODUCCIÓN TÉCNICA LOCAL DOS ESPECTÁCULOS E ACTIVIDADES DO PROGRAMA “VIGO EN FESTAS 2018” NO AUDITORIO AO AIRE LIBRE DE CASTRELOS. EXPTE. 7428/335.

Examinadas as actuacións do expediente, dáse conta do informe-proposta do 4/06/18, asinado pola xefa do Servizo de Contratación, que di o seguinte:

I.- Antecedentes

Primeiro.- En data 18 de maio de 2018 a Xunta de Goberno local (XGL) acordou aprobar o expediente de contratación da prestación do servizo da produción técnica local dos

espectáculos e actividades do programa “Vigo en Festas 2018” no Auditorio ao aire libre de Castrelos (expediente nº 7428-335).

Segundo.- Na mesma data publicouse na perfil do contratante do Concello aloxado na Plataforma de Contratación do Sector Público o anuncio de licitación do citado procedemento.

Terceiro.- En data 4 de xuño realizouse unha consulta ao servizo de contratación sobre o modo de consignar o criterio avaliable mediante fórmula relativo á experiencia do persoal e comprobouse que o modelo de proposición incluído no prego de cláusulas administrativas particulares (PCAP) non contén apartado relativo a este criterio.

FUNDAMENTOS XURÍDICOS

Primeiro.- Tal e como se relatou nos antecedentes, o modelo de proposición recollido no PCAP non inclúe o punto relativo ao criterio de valoración mediante fórmula da experiencia do persoal técnico á adscribir ao contrato.

O PCAP fixa como criterios de adjudicación avaliables mediante fórmula, no apartado 7.B da Folla de Especificacións do Contrato (FEC), os seguintes:

1. Porcentaxe de redución a aplicar aos prezos unitarios consignados no apartado 3.G desta FEC.
2. Maior experiencia en traballos de produción de espectáculos ou eventos do seguinte persoal técnico: Responsable de coordinación/xefe de emerxencias; Responsable de backstage (state manager)/xefe de intervención e Xefe de emerxencias e coordinador de auxiliares de organización e porteiros.

Sen embargo, o modelo de proposición fixado no apartado 6.B da FEC so contempla o xeito de declarar a oferta con relación ao primeiro dos citados criterios no seu punto 2. En consecuencia, parece aconsellable que o órgano de contratación aclare como consignar esta información na oferta e que o acordo se publique no perfil do contratante. De este modo garántense os principios de igualdade e concorrencia, podendo ter acceso á mesma todos os posibles interesados neste procedemento.

O modelo de proposición debería completarse cun punto 3 do seguinte teor:

“3.- O persoal técnico á adscribir á execución do contrato ten a seguinte experiencia:

- a) Responsable de coordinación/xefe de emerxencias: (nº) anos de experiencia laboral.
- b) Responsable de backstage (state manager)/xefe de intervención: (nº) anos de experiencia laboral.
- c) Xefe de emerxencias e coordinador de auxiliares de organización e porteiros: (nº) anos de experiencia laboral”.

Segundo.- A LCSP regula a información aos interesados no artigo 138. Determina este precepto que o acceso aos pregos e a documentación complementaria deberá garantirse por medios electrónicos a través do perfil de contratante, acceso que será libre, directo,



Concello de Vigo

completo e gratuíto, desde a data da publicación do anuncio de licitación. E regula a solicitude de aclaracións formuladas polos interesados, fixando o prazo de presentación e o de resposta ás mesmas polo órgano de contratación. O PCAP, así mesmo, regula a información e as aclaracións na súa cláusula 11.

No caso que nos ocupa, ademais de informar aos licitadores da omisión no modelo de proposición dun apartado para consignar o criterio relativo á experiencia do persoal técnico, sería preciso ampliar o prazo de presentación de ofertas, dado que este remata hoxe.

A ampliación dos prazos de presentación de ofertas está regulada no artigo 136.2 da LCSP. Contempla este precepto dous supostos:

1. Cando os servizos dependentes do órgano de contratación non atendesen ao requirimento de información que o interesado formulase coa debida antelación, nos termos sinalados no apartado 3 do artigo 138.
2. No caso en que se introduzan modificacións significativas nos pregos da contratación.

E determina que se considera modificación significativa dos pregos. Esta será a que afecte a:

- a) A clasificación requirida.
- b) O importe e prazo do contrato.
- c) As obrigacións do adxudicatario.
- d) O cambio ou variación do obxecto do contrato.

No presente caso non concorre ningún dos supostos previstos na lei para a ampliación do prazo, xa que esta Administración nin desatendeu un requirimento de información dun interesado, nin tampouco trátase dunha modificación significativa dos pregos consonte ao artigo 136.2. No entanto, por analoxía, debería aplicarse este precepto, pois precisase completar o modelo de proposición para evitar posibles erros dos licitadores á hora de presentar a súa oferta e hoxe remata o prazo de presentación de ofertas. Máxime tendo en conta que se o licitador se apartase sustancialmente do modelo de proposición establecido podería ser excluído da licitación (artigo 84 RLCAP e cláusula 14.4 do PCAP).

Respecto da duración da prórroga, o artigo 136.2 non fixa un prazo concreto, limitase a indicar que esta será proporcional á importancia da información solicitada polo interesado. Dado que neste caso ningún licitador solicitou información adicional, tal e como prevé a cláusula 11 do PCAP, parece suficiente ampliar o prazo de presentación de ofertas en tres días naturais, rematando o xoves 7 de xuño, prazo que se considera proporcional á importancia da información solicitada.

Terceiro.- A competencia, tanto para modificar o modelo de proposición como para a ampliación do prazo correspóndelle á Xunta de Goberno Local, na súa cualidade de órgano de contratación (DA 2ª LCSP).

Acordo

En base ao anterior, proponse á Xunta de Goberno Local, en uso das facultades que lle confire a lexislación vixente, a adopción do seguinte **acordo**:

“1º.- Completar o modelo de proposición previsto no apartado 6.B da FEC do prego de cláusulas administrativas particulares para a contratación por procedemento aberto do servizo de produción técnica local dos espectáculos e actividades do programa “Vigo en Festas 2018” no auditorio ao aire libre de Castrelos, expediente nº 7428-335 cun punto 3 do seguinte teor:

“3.- O persoal técnico á adscribir á execución do contrato ten seguinte experiencia:

- a) Responsable de coordinación/xefe de emerxencias: (nº) anos de experiencia laboral.*
- b) Responsable de backstage (state manager)/xefe de intervención: (nº) anos de experiencia laboral.*
- c) Xefe de emerxencias e coordinador de auxiliares de organización e porteiros: (nº) anos de experiencia laboral”.*

Inclúese como Anexo a este acordo o modelo de proposición completo.

2º.- Ampliar o prazo de presentación de ofertas do citado procedemento en tres días naturais.

3º.- Publicar o presente acordo no perfil do contratante do Concello de Vigo aloxado na Plataforma de Contratos do Sector Público”.

Acordo

A Xunta de Goberno local aproba a proposta contida no precedente informe.

ANEXO MODELO DE PROPOSICIÓN

D./D^a., con DNI nº, en nome propio (ou en representación de,), informado/a da licitación para a contratación por procedemento aberto do servizo de produción técnica local dos espectáculos e actividades do programa “Vigo en Festas 2018” no auditorio ao aire libre de Castrelos, expediente nº 7428-335, manifesta:

1.- Que acepta integramente os pregos de prescricións técnicas e condicións administrativas que rexen esta contratación.

2.- Propón unha porcentaxe de desconto de (%) a aplicar aos prezos unitarios consignados no apartado 3.G desta FEC.

3.- O persoal técnico á adscribir á execución do contrato ten seguinte experiencia:

- a) Responsable de coordinación/xefe de emerxencias: (nº) anos de experiencia laboral.



Concello de Vigo

- b) Responsable de backstage (state manager)/xefe de intervención: (nº) anos de experiencia laboral.
- c) Xefe de emerxencias e coordinador de auxiliares de organización e porteiros: (nº) anos de experiencia laboral.

Lugar, data e sinatura do licitador.

3(592).- EXPEDIENTE DE CONTRATACIÓN DO ARTISTA DOMINGO TEIXEIRA RODRÍGUEZ PARA PARTICIPAR NO CUARTO PROGRAMA PARA ARRUMBAR MEDIANEIRAS E OUTROS ELEMENTOS VERTICAIS CON INCIDENCIA SOBRE A VÍA PÚBLICA. EXPTE. 8904/307.

Examinadas as actuacións do expediente, visto o informe xurídico de data 28/05/18, e o informe de fiscalización do 31/05/18, dáse conta do informe proposta do 28/05/18, asinado pola xefa de Patrimonio Histórico, a xefa da Área de Tenencia de Alcaldía, a concelleira delegada de Patrimonio Histórico e o concelleiro delegado de Facenda, que di o seguinte:

1.- ANTECEDENTES:

Con data 22 de marzo de 2018, a concelleira-delegada de Patrimonio Histórico dictou orde de inicio do expediente administrativo dirixido á CONTRATACIÓN DO ARTISTA DOMINGO TEIXEIRA RODRÍGUEZ PARA PARTICIPAR NO CUARTO PROGRAMA PARA ARRUMBAR MEDIANEIRAS E OUTROS ELEMENTOS VERTICAIS CON INCIDENCIA SOBRE A VÍA PÚBLICA.

No expediente inclúense os seguintes documentos:

- Informe xustificativo da necesidade e idoneidade do contrato, asinado pola xefa de Patrimonio Histórico e a concelleira delegada de Patrimonio Histórico de data 23 de abril de 2018.
- Resolución inicio do expediente de contratación da concelleira delegada de Patrimonio Histórico, de data 23 de abril de 2018.
- Prego de prescricións técnicas particulares asinado pola xefa de Patrimonio Histórico con data 23 de marzo de 2018.
- Memoria xustificativa para a elaboración do PCAP asinada o 9 de maio de 2018 pola xefa de Patrimonio Histórico e a concelleira delegada de Patrimonio Histórico, para a contratación do artista Domingo Teixeira Rodríguez para participar no cuarto programa para arrumar medianeiras e outros elementos verticais con incidencia sobre a vía pública.
- Informe da xefa do Servizo de Contratación indicando que o expediente reúne a documentación esixida pola lexislación vixente en materia de contratación, de data 9 de maio de 2018.
- Prego de cláusulas administrativas particulares asinado pola xefa do Servizo de Contratación o 24 de maio de 2018.
- Informe do xefe do servizo de Administración Electrónica sobre a imposibilidade de realización da licitación electrónica de data 10 de maio de 2018.

2.- CONDICIÓN DEFINITORIAS DO CONTRATO:

a.- Obxecto e natureza do contrato:

OBXECTO DO CONTRATO: O contrato ten por obxecto a execución dunha expresión artística de Domingo Teixeira Rodríguez, dentro do “Cuarto programa para arrumar medianeiras e outros elementos verticais con incidencia na vía pública”, aprobado pola Xunta de Goberno Local en data 28 de novembro de 2017.

O presente contrato atópase vinculado ás competencias propias previstas no art. 25.2.a) e 25.2.m) da Lei 7/1985, de 2 de abril, reguladora das Bases do Réxime Local, en redacción dada pola Lei 27/2013, de 27 de decembro.

Con este contrato preténdese satisfacer a necesidade pública de mellorar os espazos urbanos con expresións artísticas, que pode encadrarse dentro das competencias propias dos municipios relativas a “Urbanismo: planeamento, xestión, execución e disciplina urbanística. Protección e xestión do Patrimonio histórico. Promoción e xestión da vivenda de protección pública con criterios de sustentabilidade financeira. Conservación e rehabilitación da edificación” (artigo 25.2.a da Lei 7/1985, de 2 de abril, reguladora das Bases do Réxime Local).

b.- Procedemento de adxudicación e forma de tramitación.

A forma de tramitación do expediente será a ordinaria, conforme ó disposto no artigo 116 da LCSP.

O contrato adxudicarase conforme ao procedemento negociado sen publicidade, por canto, de acordo co artigo 168.a 2º LCSP, o contrato só pode encomendarse a un empresario determinado o ter por obxecto a creación dunha obra de arte ou representación artística única non integrante do Patrimonio Histórico Español.

Con data 28 de novembro de 2017, a Xunta de Goberno Local acordou aprobar o “CUARTO PROGRAMA PARA ARRUMBAR MEDIANEIRAS E OUTROS ELEMENTOS VERTICAIS CON INCIDENCIA SOBRE A VÍA PÚBLICA”, coa finalidade de contribuír ao proceso de recuperación e revitalización do entorno urbano e comercial e da paisaxe urbana, a posta en valor do patrimonio da cidade, e á mellora da calidade de vida tanto dos habitantes destas zonas coma do resto de cidadáns, así como dar a coñecer e valorar a obra dos artistas urbanos.

O programa estrutúrase en dúas fases: unha primeira de “Actuacións preparatorias”, na que se seleccionan os espazos, artistas e centros educativos, e outra segunda de execución dos murais ou outras expresións artísticas.



Concello de Vigo

Os artistas que son seleccionados pola comisión técnica do programa, segundo se recolle nas bases aprobadas pola Xunta de Goberno Local. Dita comisión do programa, en sesión ordinaria de 3 de xaneiro de 2018, acordou invitar ao artista Domingo Teixeira.

O artigo 169.5 da LCSP determina que no caso de que unicamente participe un candidato, a mesa de contratación, ou no seu defecto, o órgano de contratación, sempre e cando sexa posible, deberá negociar con el os termos do contrato. No entanto, no presente caso, dado que o boceto da obra a realizar xa foi aprobado e o prezo a aboar ao artista tamén, non procede negociar.

c.- Orzamento base de licitación/partida orzamentaria.

O orzamento base de licitación é de 5.000 euros (este contrato está exento do imposto sobre o valor engadido).

A Concellería de Patrimonio Histórico, ante a dificultade de estimar o valor de mercado das obras de cada un dos artistas que se pretenden contratar para executar o programa municipal de medianeiras, optou por fixalo atendendo os seguintes criterios: a tipoloxía do espazo (muros ou medianeiras), a superficie total do espazo e a proxección/valoración do/a artista no mercado da arte.

Para a execución dos compromisos económicos derivados da presente contratación existe crédito na aplicación orzamentaria 3340.2260900 ACTIVIDADES CULTURALES PROGRAMA ARTE, RC 7787.

d.- Criterios de valoración e xustificación:

O único criterio de adxudicación será a **redución do prezo do contrato**.

Dado que neste procedemento hai un único licitador, non se lle outorgará puntuación.

e.- Prazo de execución e prórroga:

O prazo de execución é de un mes, e non poderá ser obxecto de prórroga.

f.- Solvencia económica, financeira e técnica:

No presente procedemento non se esixe ao licitador a acreditación de solvencia por canto o mesmo foi seleccionado pola comisión técnica do "CUARTO PROGRAMA PARA ARRUMBAR MEDIANEIRAS E OUTROS ELEMENTOS VERTICAIS CON INCIDENCIA SOBRE A VÍA PÚBLICA", en sesión ordinaria de 3 de xaneiro de 2018, e o contrato so pode celebrarse co mesmo.

g.- Condicións especiais de execución:

Establécense como condicións especiais de execución as seguintes de tipo medioambiental:

1. Minimización do consumo de auga e a reutilización de mesma.
2. Minimización do consumo de recursos naturais como materias primas e de combustibles.
3. Minimización da xeración de residuos perigosos e non perigosos así como a súa reutilización ou reciclaxe.
4. Limpeza dos equipos e maquinaria utilizados para a prestación do servizo con produtos non contaminantes e en lugares adecuados ó efecto.
5. Minimización de ruídos e vibracións que poidan ocasionar molestias ós veciños e traballadores.
6. Os traballos que impliquen ruídos e vibracións molestas se realizarán en horarios compatibles co descanso dos cidadáns.
7. Os residuos susceptibles de reciclado se depositarán en colectores independentes para facilitar o seu tratamento.

h.- Modificación do contrato:

Non está prevista a modificación do contrato.

i.- Responsable do Contrato:

A responsable do contrato será a Xefa de Servizo de Patrimonio Histórico.

j.- Subcontratación:

O contratista, dado que o obxecto do contrato son prestacións personalísimas, non poderá subcontratar a súa execución.

3.- FUNDAMENTOS TÉCNICOS E XURÍDICOS.

3.1.- A iniciación do expediente de contratación corresponde ao Órgano de Contratación (artigo 116.1 LCSP), que nos municipios de grande poboación, como é o de Vigo, é a Xunta de Goberno Local (disposición adicional 2ª. 4 LCSP) e, por delegación deste (acordo da Xunta de Goberno Local de 15 de xullo de 2013), aos concelleiros de área.

3.2.- O contrato non suporá desequilibrio orzamentario, cumprindo as esixencias dos principios de estabilidade orzamentaria e sostenibilidade financeira (artigo 7.3 da Lei orgánica 2/2012, do 27 de abril), xa que esta proposta de gasto atópase contemplada no orzamento vixente e a mesma non contempla ningunha outra obriga que se derive do mesmo, xa que a mesma ten a consideración da execución dun servizo de carácter finalista para o Concello.

3.3.- No expediente xustifícase a necesidade e idoneidade do contrato (artigo 28 LCSP), así como os criterios de solvencia económica (artigo 116.4.C LCSP), a xustificación do prezo



Concello de Vigo

do contrato e o seu método de cálculo (artigo 112 LCSP), os criterios de adxudicación e a súa adecuación ao obxecto do contrato (artigo 145.1 LCSP), así como as fórmulas de valoración (artigo 146.2 LCSP). Non é necesaria a xustificación do procedemento por tratase dun procedemento aberto.

3.4.- É preceptiva previa aprobación do expediente de informe da titular da asesoría xurídica (Disposición adicional 3ª.8 da LCSP)

3.5.- A aprobación do expediente de contratación correspóndelle á Xunta de Goberno Local, na súa calidade de órgano de contratación (disposición adicional 2ª. 4 LCSP), e o informe favorable de fiscalización a Intervención Xeral, de conformidade co previsto no artigo 116.3 da LCSP.

4.- PROPOSTA:

Por todo o exposto, propónse á Xunta de Goberno Local que adopte o seguinte:

1º.- Aprobar a contratación polo procedemento negociado sen publicidade (artigo 168.a 2º LCSP) do artista Domingo Teixeira Rodríguez para participar no cuarto programa para arrumbar medianeiras e outros elementos verticais con incidencia sobre a vía pública.

2º.- Aprobar o Prego de Prescricións Técnicas Particulares, asinado pola xefa do Servizo de Patrimonio Histórico con data 23 de marzo de 2018.

3º.- Aprobar o Prego de Prescricións Administrativas Particulares, asinado pola xefa do Servizo de Contratación con data 24 de maio de 2018.

4º.- **Autorizar o gasto:**

- A) ORZAMENTO BASE DE LICITACIÓN: 5.000 euros
- B) IVE A SOPORTAR POLA ADMINISTRACIÓN:** este contrato está exento do imposto sobre o valor engadido.
- C) ORZAMENTO TOTAL: 5.000 euros
- D) VALOR ESTIMADO DO CONTRATO: 5.000 euros

Aplicación orzamentaria: 3340.2260900 ACTIVIDADES CULTURALES PROGRAMA ARTE, RC 7787.

5º.- Abrir o procedemento licitatorio para selección do contratista na forma prevista na lexislación vixente.

Acordo

A Xunta de Goberno local aproba a proposta contida no precedente informe.

4(593).- PROPOSTA DE APROBACIÓN DO PROXECTO DE “HUMANIZACIÓN DA RÚA PAZOS, ENTRE LÓPEZ MORA E MENÉNDEZ PELAYO”. EXPTE. 3495/443.

Examinadas as actuacións do expediente, visto o informe de fiscalización de data 1/06/18, dáse conta do informe-proposta do 29/05/18, asinado pola técnica de xestión, o xefe do Servizo Administrativo e de Control Orzamentario, o xefe do Servizo Xurídico de Servizos Xerais e o concelleiro delegado de Fomento, que di o seguinte:

ANTECEDENTES DE FEITO

I.- O Concelleiro-Delegado da Área de Fomento, en data 04.12.17, resolveu autorizar o gasto para redacción do proxecto de "Humanización da rúa Pazos, entre López Mora e Menéndez Pelayo", a prol da empresa Ordenación Territorial Infraestruturas e Medioambiental (B27841535).

II.- O orzamento municipal, aprobado definitivamente polo Concello-Pleno, en sesión de 27 de decembro de 2017 recolle dentro do programa 1532 “Pavimentación vías públicas” a aplicación orzamentaria 1532.619.00.02 (Humanz. Rúa Pazos M.Pelayo-López Mora).

III.- A empresa ORDENACIÓN TERRITORIAL INFRAESTRUTURAS E MEDIOAMBIENTAL, trala fase de supervisión do borrador presentado, presenta proxecto de “HUMANIZACIÓN DA RÚA PAZOS, ENTRE LÓPEZ MORA E MENÉNDEZ PELAYO”, redactado polo Enxeñeiro de Camiños, Canais e portos D. Santiago N. López Fontán, cun orzamento base de licitación máis IVE de CENTO TRINTA E CINCO MIL NOVECENTOS NOVENTA E NOVE EUROS CON NOVENTA E NOVE CÉNTIMOS (135.999,99 EUROS) de data febreiro de 2018.

IV.- O Enxeñeiro de Camiños, Canais e Portos, con data 22.05.2018, informou que o proxecto de obras presentado cumpre cos obxectivos do contrato, polo que o Concelleiro Delegado da Área de Fomento, en data 23.05.2018, resolveu iniciar expediente para a aprobación do citado proxecto.

V.- A actuación desenrólase na rúa Pazos. As obras a executar se enumeran a seguir;

- Regularización das aliñacións en planta.
- Regularización da rasante.
- Ampliación de beirarrúas.
- Ordenación viaria: sentido ascendente, único carril.
- Xeración dunha banda de aparcamento ordenada.
- Melloras no mobiliario do espazo libre do entronque con López Mora.
- Mellora da pavimentación.
- Mellora dos servizos urbanos.
- Modernización das instalacións.
- Cambio de mobiliario urbano.

O prazo estimado para a execución das obras descritas é de CATRO meses.

VI.- A Enxeñeira Municipal da Oficina de Supervisión de Proxectos, I.T.O. e Asistencia Municipal, emite en data 25.05.2018 informe, indicando o seguinte:



Concello de Vigo

“Xa que a contía do proxecto é inferior a 500.000 euros, e a actuación non afecta a estabilidade, seguridade e estanquidade da obra, o presente informe ten carácter facultativo. Os custes unitarios incluídos no proxecto, considéranse adecuados para a execución do contrato, estimase que son prezos xerais de mercado.

A documentación do proxecto cumpre os obxectivos do contrato de redacción e considérase completa, e que o proxecto toma en consideración as disposicións xerais de carácter legal e regulamentario, así como a normativa técnica de aplicación, reunindo todos os requisitos legais esixidos de conformidade coa lexislación vixente e actualmente regulados no artigo 235 da “lei 9/2017, 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014” (en adiante, LCSP), e polo “Regulamento Xeral da lei de contratos das Administracións Públicas, aprobado por RD 1098/2001 de 12 de outubro” polo que se informa favorablemente, aos efectos de control ordenado polo artigo 235 da citada lei.”

CONSIDERACIÓNS DE DEREITO

I.- A previsión orzamentaria de contratación da execución das obras obxecto do presente expediente require, como actuación preparatoria, de acordo co artigo 231 da LCSP, a elaboración, supervisión, aprobación e replanteo do correspondente proxecto de obras que definirá con precisión o obxecto do contrato.

II.- Os contidos mínimos e esixencias que debe reunir o proxecto de obras e o ámbito da verificación do proxecto de obras, a realizar polas oficinas de supervisión de proxectos especifícanse, nos artigos 233 e 235 da LCSP , e 125 a 137 do Regulamento Xeral da Lei de Contratos das Administracións Públicas , aprobado por Real Decreto 1098/2001, de 12 de outubro.

III.- O proxecto de obras, segundo resulta dos informes técnicos que obran no expediente, cumpre cos obxectivos da actuación proposta, refírese a unha obra completa e nel tivéronse en conta as disposicións xerais de carácter legal e regulamentario, así como a normativa técnica, de aplicación ao proxecto, tal e como resulta da táboa que figura no informe da Oficina de Supervisión de Proxectos Municipal, na que pormenorizadamente e con indicación da súa concreta localización no documento, se especifican os requisitos legais, regulamentarios e técnicos que reúne o proxecto.

IV.- A aprobación do proxecto corresponde ao órgano de contratación, a tenor do disposto no artigo 231 da LCSP, que de acordo coa disposición adicional 2ª.4 da LCSP, é a Xunta de Goberno Local, previo informe de fiscalización da Intervención Xeral Municipal (artigo 214 do Texto Refundido da Lei reguladora de Facendas Locais, aprobado por R.D.2/2004, de 5 de marzo).

V.- Aprobado que sexa o proxecto e previamente á tramitación do expediente de contratación da execución da obra, procederase a efectuar o replanteo do mesmo (artigo 236 da LCSP).

Polo exposto, propónse á Xunta de Goberno Local a adopción do seguinte

ACORDO

Aprobar o proxecto de "HUMANIZACIÓN DA RÚA PAZOS, ENTRE LÓPEZ MORA E MENÉNDEZ PELAIO", redactado polo Enxeñeiro de Camiños, Canais e portos D. Santiago N. López Fontán, cun orzamento base de licitación máis IVE de CENTO TRINTA E CINCO MIL NOVECENTOS NOVENTA E NOVE EUROS CON NOVENTA E NOVE CÉNTIMOS (135.999,99 EUROS) de data febreiro de 2018 e data sinatura dixital 24 de maio de 2018.

Acordo

A Xunta de Goberno local aproba a proposta contida no precedente informe.

5(594).- SOLICITUDE DE SUBVENCIÓN Á CONSELLERÍA DE MEDIO AMBIENTE E ORDENACIÓN DO TERRITORIO, CONVOCADA POR ORDE DE DATA 25 DE ABRIL DE 2018, DESTINADA A EXECUCIÓN DA OBRA DE "HUMANIZACIÓN DA RÚA PAZOS ENTRE LÓPEZ MORA E MENÉNDEZ PELAYO (FASE II)". EXPTE. 5550/440.

Visto o informe de fiscalización do 4/06/18, dáse conta do informe-proposta de data 1/06/18, asinado polo enxeñeiro xefe de Vías e Obras, o xefe da Área de Inversións, o asesor xurídico da Área de Fomento e o concelleiro delegado de Fomento, que di o seguinte:

Mediante Orde do 25 de abril de 2018, a Consellería de Medio Ambiente e Ordenación do Territorio aprobou as bases reguladoras e a convocatoria de subvencións, en réxime de concorrencia competitiva, destinadas á creación ou mellora de infraestruturas e equipamentos nos concellos de Galicia para o ano 2018 (código de procedemento MT300A).

Entre as actuacións subvencionables previstas no artigo 3.1 da orde atópanse, no apartado c), as obras de "*Humanización de rúas*".

Cada concello só poderá solicitar axuda para unha das actuacións descritas no artigo 3 e a actuación para a que se solicite a subvención deberase iniciar no presente exercicio 2018, e poderán estender a súa execución, tendo en conta as datas límite de xustificación que se especifican no artigo 12 da convocatoria.

En ningún caso será obxecto da axuda:

- a) A adquisición de terreos.
- b) Os proxectos de redes de luz pública que consistan unicamente na substitución de lámpadas ou luminarias; ou aqueles destinados á colocación, substitución ou reparación de elementos e pezas illadas en mobiliario ou equipamentos.
- c) Adquisición ou substitución de equipos para tratamento e xestión de residuos sólidos urbanos, que non formen parte de xeito conxunto en proxectos relativos ás actuacións c) e d) do número 1 artigo 3.

Segundo o artigo 4.3.d) da convocatoria, a axuda económica en concellos de máis de 50.000 habitantes poderá chegar a acadar un 50% do investimento, cun máximo de 500.000 euros e ata o esgotamento do crédito.



Concello de Vigo

As obras ás que o Concello de Vigo pretende aplicar a subvención que se puidera obter da mencionada convocatoria son as de “Humanización da Rúa Pazos entre López Mora e Menéndez Pelayo (Fase II)”.

O procedemento a seguir está establecido no artigo 6 (“*Iniciación e prazo de presentación de solicitude*”) da Orde de 25 de abril de 2018, que establece que para acollerse a estas axudas, os concellos presentarán solicitude dirixida á Dirección Xeral de Ordenación do Territorio e Urbanismo segundo o modelo que figura como anexo I a esta orde.

Coa solicitude deberá achegarse a seguinte documentación (artigo 6.6 da Orde):

a) Declaración responsable asinada pola persoa representante da entidade local solicitante, incluída no anexo I desta orde, segundo proceda, en que se faga constar o conxunto de todas as axudas solicitadas ou concedidas, para as mesmas actuacións solicitadas ao abeiro desta orde, das distintas administracións públicas competentes ou outros entes públicos e o compromiso de comunicar de contado cantas axudas solicite e/ou obteña doutras administracións públicas ou doutros entes públicos ou privados, nacionais ou internacionais, a partir da data desta declaración.

b) Certificación da persoa que ostenta a titularidade da secretaría da entidade local (anexo II), na cal se faga constar:

b.1) O acordo do órgano competente da entidade local polo cal se solicita a subvención para as actuacións que se pretenden executar ao abeiro desta orde, e se aceptan as condicións de financiamento e demais requisitos establecidos nela.

No referido acordo deberá constar expresamente que se aceptan as condicións de financiamento e demais requisitos establecidos na orde, e o acordo deberá estar adoptado antes do vencemento do prazo de presentación de solicitudes.

O acordo estará referido a todas as actuacións que integran o proxecto, polo que se deberá consignar a denominación e o orzamento de cada unha, así como o orzamento total.

O incumprimento destes requisitos constituirá causa de inadmisión da solicitude.

b.2) A remisión das contas da entidade local ao Consello de Contas de Galicia, correspondentes ao exercicio orzamentario de 2016. No certificado quedará acreditado que a remisión das contas ao Consello de Contas se efectuou antes do vencemento do prazo de presentación de solicitudes, polo cal se consignará a data de remisión ao Consello de Contas e non se admitirán aquelas en que non se faga constar a dita data de remisión. O incumprimento destes requisitos constituirá causa de inadmisión da solicitude.

b.3) A viabilidade do proxecto referido ao ámbito en que se pretenden realizar as actuacións obxecto da solicitude.

c) Memoria xustificativa da necesidade das actuacións para as cales solicitan subvención, asinada pola persoa representante da entidade local.

d) Nas solicitudes para obras deberá achegarse o proxecto ou anteprojecto da/s obra/s que se vaian realizar co seguinte contido mínimo:

Memoria explicativa.

Orzamento detallado.

Planos a escala suficiente.

O prazo para resolver e notificar os procedementos iniciados en virtude desta orde será dun mes, contado a partir da data de finalización do prazo de presentación de solicitudes.

A resolución notificaráselles a todos os concellos interesados, na forma prevista no artigo 24 da Lei 9/2007, do 13 de xuño, de subvencións de Galicia. Segundo o establecido no artigo 23.5 da mesma lei, o vencemento do prazo máximo sen que sexa notificada a resolución lexitima aos interesados para entender desestimada por silencio administrativo a solicitude de concesión da subvención.

O concello beneficiario disporá dun prazo de dez días, contados a partir do día seguinte ao da notificación da resolución, para comunicar a aceptación da subvención e das condicións contidas nela, ou ben comunicar a renuncia á subvención concedida. Transcorrido o prazo sen que se produza manifestación expresa, entenderase tacitamente aceptada a subvención de conformidade co artigo 21.5 da Lei de subvencións.

O obxectivo do Proxecto “Humanización da Rúa Pazos entre López Mora e Menéndez Pelayo (Fase II)” é a definición técnica precisa das obras de urbanización consideradas, de forma que poda servir de base para a tramitación e contratación do expediente de obras correspondente. Para elo se concretan obxectivos parciais, que son:

- Regularización das aliñacións en planta.
- Regularización da rasante.
- Ampliación de beirarrúas.
- Ordenación viaria: sentido ascendente, único carril.
- Xeración dunha banda de aparcamento ordenada.
- melloras no mobiliario do espazo libre do entronque con López Mora.
- Mellora da pavimentación.
- Mellora dos servizos urbanos.
- Modernización das instalacións.
- Cambio do mobiliario urbano.

Dentro das actuacións proxectadas realizarase unha renovación dos elementos de alumeadado público para mellorar a eficiencia lumínica e enerxética coa que se reducirá a contaminación lumínica ademais de acadar un maior aforro enerxético.

O proxecto consta dos seguintes documentos:



Concello de Vigo

- Memoria descritiva.
- Planos.
- Prego de condicións.
- Presuposto.
- Estudio de seguridade e saúde, de acordo co Real Decreto 1627/1997, de 24 de Outubro, polo que se establecen disposicións mínimas de seguridade e de saúde nas obras de construción.

O proxecto comprende as actuacións que de seguido se relacionan con expresión do seu orzamento:

• Movemento de terra e traballos previos	4.734,46 €
• Pavimentación e firmes	35.775,44 €
• Abastecemento	5.166,20 €
• Pluviais	8.125,41 €
• Saneamento	9.857,12 €
• Electricidade	3.024,32 €
• Telefónica	3.790,98 €
• Iluminación	7.115,86 €
• Mobiliario e acabados	4.916,06 €
• Xardinería e rego	810,95 €
• Sinalización	1.760,84 €
• Reposicións e varios	5.697,22 €
• Xestión de residuos	1.676,14 €
• Seguridade e saúde	2.000,00€

Así, ascende o orzamento de execución material a 94.451,00 euros. A esta cantidade aplicaselle un 13 % en concepto de gastos xerais e un 6 % en concepto de beneficio industrial, o que supón unha cantidade de 112.396,69 euros. A porcentaxe de IVE engadir e dun 21% o que supón un orzamento base de licitación de 135.999,99 euros.

A documentación do proxecto considérase completa tendo en conta a normativa vixente de aplicación, reúne os requisitos esixidos na Lei 9/2017, de 8 de novembro, de Contratos do Sector Público, polo que se informa favorablemente, aos efectos do control ordenado polo artigo 235 da citada lei.

Polo exposto sométese á consideración da Xunta de Goberno Local que, previo informe da fiscalización da Intervención Xeral, se adopte o seguinte acordo:

1º Aprobar a participación do Concello de Vigo na convocatoria de subvencións, en réxime de concorrencia non competitiva, destinadas á creación ou mellora de infraestruturas e equipamentos nos concellos de Galicia para o ano 2018 (código de procedemento MT300A), aprobada por Orde do 25 de abril de 2018 da Consellería de Medio Ambiente e Ordenación Territorial.

2º Solicitar a devandita subvención para a execución do proxecto da obra de “Humanización da Rúa Pazos entre López Mora e Menéndez Pelayo (Fase II)”, co obxectivo de regularizar as aliñacións en planta, regularizar a rasante, ampliar as beirarrúas, ordear a vía: sentido as-

cedente, único carril, xerar unha banda de aparcamento ordenada, mellorar o mobiliario do espazo libre do entronque con López Mora, a pavimentación e os servizos urbanos e a modernización das instalacións e do mobiliario urbano; proxecto que comprende as seguintes actuacións:

- Movemento de terra e traballos previos4.734,46 €
- Pavimentación e firmes35.775,44 €
- Abastecemento5.166,20 €
- Pluviais8.125,41 €
- Saneamento9.857,12 €
- Electricidade3.024,32 €
- Telefónica3.790,98 €
- Iluminación7.115,86 €
- Mobiliario e acabados4.916,06 €
- Xardinería e rego810,95 €
- Sinalización1.760,84 €
- Reposicións e varios5.697,22 €
- Xestión de residuos1.676,14 €
- Seguridade e saúde2.000,00€

4º.- Manifestar expresamente a aceptación polo Concello de Vigo das condicións de financiamento e demais requisitos establecidos na Orde do 25 de abril de 2018, da Consellería de Medio Ambiente e Ordenación do Territorio, pola que se aproban as bases reguladoras e a convocatoria de subvencións, en réxime de concorrencia competitiva, destinadas á creación ou mellora de infraestruturas e equipamentos nos concellos de Galicia para o ano 2018 .

5º Designar ao concelleiro delegado da Área de Fomento, D. David Regades Fernández, con D.N.I. 36.077.372-D, como representante do Concello de Vigo ante a Consellería de Medio Ambiente e Ordenación do Territorio, para os trámites que sexan precisos, de cara á obtención da subvención convocada por Orde do 25 de abril de 2018 para a creación ou mellora de infraestruturas e equipamentos nos concellos de Galicia para o ano 2018.

Acordo

A Xunta de Goberno local aproba a proposta contida no precedente informe.

E sen ter máis asuntos que tratar, o Sr. presidente rematou a sesión ás catorce horas e vinte minutos.. Como secretaria dou fé.

me.

O CONCELLEIRO-SECRETARIO DA XUNTA DE GOBERNO LOCAL,
Cayetano Rodríguez Escudero.

O ALCALDE
Abel Caballero Álvarez